

Transcription des historiens

{1} A mon très honoré et doubté seigneur monseigneur le senechal de Barrois lieutenant du Roy de Sicile notre seigneur etc. en son duchié de Bar {2} Hennequin Le Brun clerc chevaulcheur d'escuerie du dit Roy et le votre honneur service et reverence avec toute {3} humble et dehue obeissance mon tres honoré et doubté seigneur plaise vous savoir que par vertu de voz lettres de requestes {4} données au lieu de Bourmont le 6 jour du mois d'octobre l'an 1467, icelles escriptes en parchemin {5} seellees de votre seel et toutes ouvertes adreçant à noble et honoré seigneur messire Thiebault de Neufchastel chevalier {6} seigneur de Chaptel sur Mezelle et de Bainville, je l'an dessusdit le 8eme jour du dit mois acompagné {7} de Jehan de Guerrande clerc juré de Lamarche et de Jehan de Vesoulz aussi chevaulcheur du dit seigneur {8} Roy me transportay devant la place de Chastel sur Mozelle au bout du pont auquel lieu trouva {9} ung nommé Jehan d'Andelot bailli et capitaine des gens d'armes estant en la dite place, lequel me demanda {10} que je demandoie à quoy lui repondis que volentiers j'eusse parlé à monseigneur le mareschal de Bourgongne {11} lequel me repondit qui n'estoit pas au lieu mais que monseigneur d'Ericourt son filz y estoit et se je avoye lettres {12} que volentiers lui bailleroit pourveu que je atandisse jusques ad ce qui fust retourné de devers luy et lors {13} bailla vos dites lettres de requestes au dit Jehan d'Andelot lequel les portast au dit seigneur d'Ericourt et me fist demourer {14} l'espace d'une heure et puis retourna devers moy et me dist que vos dites lettres se adressoient à {15} mon dit seigneur le mareschal lequel estoit en la court de monseigneur de Bourgongne et que je ly portasse les dites requestes {16} disant qu'ilz n'avoient nulz messagiers pour y envoyer. Sur quoy leur respondis que je n'avoye nulles ordonnances {17} d'aller à la court de monseigneur de Bourgongne ne aussi de rappourter mes lettres de requestes et pour leurs {18} reffus, je mis les dites requestes sur une baire volante et m'en retourna ; et tout ce mon très honoré et {19} doubté seigneur vous certiffie je soubz mon seing manuel dont je use en mon dit office exerçant par moy {20} ainsi avoir esté fait les jours et an dessus dits.

{Signé}Lebrun